

lis Gnovis

■ NIMIS. Il vin che al devente... aghe

A Nimis a son bogns parfin di gambià i miracul! No par nuie si dîs che a son i bogns, i triscj e chei di Nimis. Ma in chest câs in sens dal dut positif, parcè che chei dal país a son impegnâts a fâ un miracul vèr e propi, no divin – scusait il zûc di peraulis – ma di tiere, che al nas de disponibilitât di tanç di lôr a dà une man a fradis che 'nd àn dibisugne, e che a son a stâ tant lontan di lôr. Si trate di un proget clamât "Din un tai ae sêt", un titul che al dîs dut; un proget che cu lis uffertis otignudis cu la distribuzion di doi vins speciâi di Nimis – dulà che i vins a son propit di sest – metûts a disposizion di une ventine di produtôrs locâi, che si son zontâts ançe produtôrs dal Venet, dal Piemont e de Toscane, si rivarà a finanziâ la realizazion di doi poçs par tirâ sù la aghe tal Kenia, tal Sud Sudan e in altris regjons de Afriche. Al è dal 2007 che il proget al va indenat, cul supuart di un missionari combonian, Dario Laurencig, originari des Vals dal Nadison, che di une cincuantine di agns si da di fâ cu la aghe. Il nestri missionari al è un "rbdomant", che cu lis sôs bachetutis al rive a scuvierzi dulà che si cjate la aghe. Ma par tirâle sù a coventin palanchis, e ve la pensade: chês a vegnin sù cul vin.

■ TARVISIAN. Benvignût a Speedy, il castorin!

La mari, che per intant le vevin clamade "Ponta", in onôr dal fotograf naturalist Renato Pontarini, e jere rivade tal Tarvisian tal 2023, biel che il so compagn al jere stât il prin esemplâr di castor intivât in Italie tal 2018, daspò cinc secui di assente di chescj nemâi. Il lôr piçul al è stât clamât "Speedy", e al è un castorin bon nadadôr e svelto come il so cusin roditôr, Speedy Gonzales, che ducj o vin viodût al cine. A son stâts i ricercjadôrs dal "Progetto Lince Italia" a fâ la scuvierte, daspò di vègn tignût sot osservazion, 24 oris su 24, la tane di "Ponta". E al è stât propit il fotograf Pontarini, une gnot, a fermâ la imagjin di mari cul fi. Grande gjonde pai ricercjadôrs, che no vuelin poni limits ae nature e che a sperin in altris buinis gnovis de fameute che e à metude sù cjase – pardon, tane – des bandis dal Tarvisian.

■ GLEMONE. 2300 firmis cuintri la strade forestâl par Ledis

Intune zornade sole, a Glemone, a son stadis racuelts ben 900 firmis (su 2.300 in dut) cuintri il proget che al previôt la realizazion di une strade forestâl che dai clapons dai Riui Blancs passant pal Cuel di Scric e pe Forçe, e varès di rivâ te valade di Ledis, dulà che agnorums indaûr tanç citadins di Glemone a lavin a taiâ lens e a passonâ i trops, ma ançe a racuei frambues che magari a puartavin là di "Falomo" che a 'ndi faseve un sirop rinomât. Te valade si cjate ançe il ripâr "Partigiani Osoppo" e une gleseute dulà che in ocasion de avostane "Fieste di Ledis" si fâs memorie dai 53 partigians di Glemone muarts intant de lote pe Liberazion. Cul sproc "Difindin lis nestris montagnis", i representants di "Progetto Gemona" a 'n presentât al Comun la petizion par fermâ cheste opare, che, di là di "presentâ un fuart impat paisagjistic e ambientâl, no varès nissune utilitât pe comunitât". Al so puest a proponin di destinâ il finanziament previoudût par sistemâ i trois, massime chel che al puarte ae forçe di Ledis, che a vuê no si pues praticâ.

■ UNIVERSITÂT. Borse di studi sul furlan e su lis sôs lenghis "sûrs"

Al è timp fin ai 11 di Lui par presentâ la candidature pe amission al cors di dottorât di ricerce in Linguistiche promovût de Universitât di Bolzan adun cu la Universitât di Verone e in colaborazion cu la ARLeF-Agenzie regionâl pe lenghe furlane. Tra lis siet borsis a disposizion, une e je dedicate al proget su la analisi comparative des politichis di tutele dal rumanc, dal ladin e dal furlan. Duti lis laureis specialistiche o magjistrâls a son ametudis. Duti lis informazions a son a disposizion online su www.unibz.it

Miercus 26	S. Josemaria Escrivà p.	Domenie 30	XIII Domenie vie pal an
Joibe 27	S. Cirili di A.	Lunis 1	S.te Ester di B.
Vinars 28	S. Ireneu v.	Martars 2	S. Oton v.
Sabide 29	S.ts Pieri e Pauli a.	Il timp	Timp variabil



Il soreli
Ai 26 al jeve aes 5.18 e al va a mont aes 21.02.



La lune
Ai 28 ultin quart.

Il proverbi
I parinçj si cognossin a fassis, a gnovis e a cassis.

Lis voris dal mès
L'ort nus da simpri sodisfazions: cumò o podin tirâ sù carotis, cesarons, cevolis, cucins, savôrs.

Chei di Udin,
tra scomunichis e interdets

Storie dai tançj proviodiments che a passavin "sore il cjâf" dai udinês

Al fo un timp che la autoritât ecclesiastiche e jere di manie largje cun scomunichis e interdets, ançe cuant che no si tratave propit di cuistions di nature teologjiche o di religion. E massime cun l'interdet, che dispès al colpeve une citât, e Udin, vie pe ete patriarcjâl, 'nt à patidis plui di cualchi volte lis consecuencis. Chest ançe parcè che e jere la capital di un Friûl che al bruntulave di un continui dal mâl di panze dai siei nobii pedoglots, ma ançe di un teritori rezût di un princip-patriarce dal pont di viste juridic sogjet a Rome, che no i displesse di meti la sò çate benedete ançe tai intrics di caratar politic. Par – relative – fortune dai udinês e dai lôr aministradôrs, l'interdet, massime te fate de improvizazion di acedi a dutis o a gran part des funzions religjosis, al vignive dispès limitât a cualchi menace o a cualchi proviodiment cence consecuencis, massime se compagnât de oblazion pecuniarie stabilide de autoritât. Un dai prins cês che o cognossin al sarès chel dal 1350, e al podarès jessi conferit ae muart dal patriarce Bertrant sui prâts de Richinvelde, che al jere ai 7 di Jugn di chel an. Di fat, tai "Anâi" de citât di Udin si lei che un ciert Raimondo al ves di procedi "ad excommunicationem contram ecclesiam Utini", e al varès vût di fâlu dal pulpit de glesie canonicâl; e lui cussì al fasè, tant che doi mès daspò il cjamerâr al notave che il Raimondo soredit al veve paiât dôs marchis e mieze di denârs a doi nodârs, che a jerin lâts fin a Vignesie par sistemâ la cuistion. Forsit la comuniche e fo volude dal patriarce Nicolau di Lussemburg par vendicâ la muart dal so predecessôr, e direte cuintri i avversaris udinês dal patriarce Bertrant. E plui di cualchi volte la scomuniche/interdet e podeve passâ



PHILIPPE D'ALENÇON.



Filip D'Alençon e une sô medaie

sore il cjâf di udinês che no savevin nancje il parcè, come tal cês sucedût tal 1359, cuant che tai "Anâi" o cjatin registrade la nomine di commissaris inviâts al vescul di Padue par vie di un interdet, e simpri a spesis dal Comun. No si sa la reson di chest proviodiment, forsit peât a cualchi disubidience ae autoritât dai Deans, che a dopravin il lôr podê secont il lôr comut, violant dirits e consuetudinis, cul sbroc dai malumôrs dai citadins. Parfin dal pape i udinês a scugnivin parâsi, parcè che cuant che al inviave i siei interdets "urbi et orbi", ducj i fedei a vevin di sbassâ il cjâf. Tal 1375, il pape Grivôr XI al mandave fûr un interdet cuintri la republiche di Florence e i florentins, par vie che in chel moment il lôr rapuart nol jere dai miôr. E Udin ce centravial? Al centrave, par vie che a Udin, in chei agns, i florentins – massime banchirs e marçjadants – no si contavin di sigûr su la ponte dai dêts, e l'interdet al valeve ançe par lôr, e pai udinês, se no ju vessin mandâts vie de citât. Il Comun al veve cirût di fâ comprendi aes autoritâts

religjosis che i florentins di Udin no si impaçavin des cuistions tra Florence e il pape; che al plui a jerin un pôc svelts cu la lenghe, ma nuie ce fâ. Altris ambassadôrs, simpri a paiament, cun Glemone e Cividât, che ançe lôr a 'ndi vevin di florentins, a Rome, biel che a Vignesie lis autoritâts no volevin fâ sunâ cjampanis e dâ ai fedei i sacraments. Bisugnâ spietâ che al muris il pape, e che il so sucessôr, Urban XI, al sieràs la cuistion. E fo la politiche a previodi ançe l'interdet che l'aministradôr patriarcjâl Filip d'Alençon al mandâ fûr cuintri i siei avversaris, che no lu volevin come aministradôr dal Patriarce. Par cidinâ i contendents, il pape al nomenâ il patriarce di Grau e il vescul di Bergum, cence sucès. Cun 38 ducâts il comun di Udin al mandâ a Bergum il dotôr fisic Jacopo Pavona, che al metè a puest la cuistion, cul paiament di 360 ducâts al vescul pes spesis sostignudis par imponi... e par gjavâ il so interdet.

Roberto Iacovissi

Tradizions furlanis dal mès par cure di Mario Martinis

LA MARI DI SANT PIERI

Une volte, ançe la devozion di Sant Pieri e jere une vore pandude in Friûl e ancjemò in di di vuê in diviers pais, li che la glesie e je intitulade al prin dai apuestui, e je zornade di sagra e di marçjât. E come che al succedeva pai sants plui impuartants logâts tai ponts di fonde dal calendari, ançe la fieste liturgjiche di Sant Pieri, celebrade il 29 di jugn, e cjapâ contignûts e alegoriis te tradizion populâr. Cussì, passe che tiermin meteorologjic (la burascje di Sant Pieri) e segnaladôr dal cicli agrari (A Sant Pieri il sorc al tapone il puieri), chest sant al diventâ ançe indicadôr calendariâl, tant che une volte al segnave che e jere passade la metât de stagion pai fornasîrs furlans sparnicâts tai stabiliments di mieze Europe (A Sant Pieri il fornasîr al è vieri). No dome. Secont lis superstizions populârs dal Friûl, il timp trist, che par solit si discjadenave ator dal solstizi de astât e massime



jenfri lis fiestis "climaterichis" di Sant Zuan a Sant Pieri (24 e 29 di jugn), al jere opare niemancul che de triste mari di Sant Pieri, che, cu la complicitât di Lucifar, e jesseve fûr par un trat dal Infer, li che e jere stade condanade par simpri. Te ultime setemane di jugn, cheste femenate si discjadenave savoltant la meteorologie: e fuive i aiars, e inglaçave lis plois, e meteve adun nûi di fâ pôre, tons e saetis e cussì e inmaneave temporâi, burascjiis, rogants, codebuiis e tampiestis che lavin a distrui cjamps coltivrâts e pomis sui arbu. La mari di Sant Pieri, sicheduncje, e jere il mitic ent spirituâl dal mâl de atmosfere dacis il solstizi de astât, ven a stâi in coincidence dal cambiament semestrâl dal moviment aparent dal soreli. Partant, al è facil intraviodi te figure de mari di Sant Pieri la figure mitiche specuâr de Befane-Therosega-Erodiade che si presentave tor il solstizi dal univer.